

# **SARS E KGAKOLA MOKGWA O BOHLALE, O BONOLO LE O SIRELETSEHILENG BAKENG SA BALEFALEKGETHO SEHLENG SENA SA HO FAELA**

**Tshwane, 2 Phupu 2026** — Sehla sa ho Faela sa Afrika Borwa bakeng sa 2026 se qadile semmuso nakong eo Ditshebeletso tsa Lekgetho tsa Afrika Borwa (SARS) di neng di qala ka lethathama la dintlafatso tsa dijithale ho ntlafatsa tsela eo balefalekgetho ba sebeletswang ka yona, ka ho etsa hore boikobelo ba lekgetho bo nolofale, bo potlake, le hore bo sireleletsehe molemong wa dimilijone tsa balefalekgetho. Haesale ho tloha mafelong a la 1 Phupu 2026, ke balefalekgetho ba fetang 1.9 million ba ileng ba hlalohjwa ka tsela ya othomathike mme ke dipusetso tse ka bang R8 billion tse lefilweng nakong ya dihora tse 72.

Dintlafatso tsena ke karolo ya boitlamo ba SARS bo mabapi le tshebeletso e hlwahlwa mmoho le ponelopele ya yona ya ho aha SARS e bohlale, ya sejwalejwale le eo botshepehi ba yona bo sa belaelweng. SARS e ikemiseditse ho fana ka tlhakisetsa le nnetefatsetso, le ho nolofaletsa balefalekgetho ho ikobela boitlamo ba bona.

Sehla sa ho Faela sa 2026 se ahella hodima katleho ya *Auto Assessment* mmoho le botsetedi bo bonahalang bo entsweng ke SARS hodima thekhnoloji, bohlale ba maiketsetso, momahanyo ya deitha mmoho le tshebeletso ya dijithale. Balefalekgetho ba tla una molemo wa motjha o tobileng wa ho faela, bokgoni ba ho ka iketsetsa dintho, tshireletseho e ntlafaditsweng mmoho le dikanale tse ntlafaditsweng tsa dijithale tseo sepheo ka tsona e leng ho fokotsa matsapa, ho ntlafatsa nepahalo le ho fokotsa tlhokeho ya ho etela makala a SARS.

“Sepheo sa rona ke ho etsa hore boikobelo bo be bonolo bakeng sa balefalekgetho ba tshepahalang”, ho rialo Ngaka Johnstone Makhubu, Khomeshenara ya SARS. “Ntlafalo ka nngwe e entsweng Sehleeng sena sa ho Faela e tobile ho ntlafatsa tshebeletso, ho fokotsa botshopodi le ho neha balefalekgetho tshepo e ntlafatseng ha ba buisana le SARS. Re batla hore balefalekgetho ba nke nako e nnyane ba sebetsana le tsa taolo mme ba sebedise monyetla wa ditshebeletso tsa rona tsa dijithale”.

## **Dintlafatso tsa bohlokwa tse tsebisitsweng Sehleeng sa ho Faela sa 2026:**

- Dihlahlobo tse nepahetseng le ho feta tsa *Auto Assessment* tse tshehetswang ke deitha e atelositsweng ya mehlodi ya mekga ya boraro.
- Ditshebeletso tsa dijithale tse atelositsweng tsa boiketsetso ka tshebediso ya eFiling, SARS MobiApp, le SARS Online Query System.
- Profaele e ntlafaditsweng ya tshireletseho ka nnetefatso ya bayometriki, nnetefatso ya metjha e mmedi mmoho le tshireletso ya maemo a fapaneng ya disebediswa tsa dikgokahanyo.
- Tshehetso e atelositsweng ka tshebediso ya mothusi wa marangrang e leng *Lwazi AI virtual assistant*.

- Bokgoni ba ho hlomathisa ditokomane tsa tshehetso ka tshebediso ya WhatsApp.
- Phihliso ya Ditsebisano tsa Hlahlobo mmoho le Diteitente tsa Akhaonto ka tshebediso ya WhatsApp mmoho le ka dikanale tse ding tsa dijithale.
- Momahanyo e ntlafatseng ya lesedi la molefalekgetho le ntlafalo ya lesedi le seng le kentswe dikgutlisong
- SARS e entse hore ho be le bokgoni bo hlokehang ba ho shebana le methamo e eketsehileng ya balefalekgetho ba buisanang le yona ka thuso ya dikanale tse fapaneng.

Dintlafatso tsena ke karolo ya mawala a SARS a ho etsa hore ho faelwa ha lekgetho e be ntho e thellang feela ho tloha qalong le ho isa qetellong ya leeto la molefalekgetho ka mong, ho tloha ngodisong le ho *Auto Assessment*, ho eFiling, nnetefatsong, le dipusetso. Dintlafatso tsena ho lebelletswe hore di fokotse matsapa a taolo, ho etsa hore dikarabelo di potlake le ho ntlafatsa kgotsofalo ya balefalekgetho.

SARS e lebelletse hore balefalekgetho ba fetang dimilione tse tshelela ba fumane dihlahlobo tsa *Auto Assessment* monongwaha. Ka ho sebedisa lesedi le tswang ho beng ba mesebetsi, dibanka, dikema tsa kalafo, matlole a peho ya meja fatshe mmoho le mekga e meng ya boraro, SARS e kgona ho kenya lesedi le hlokehang ka hara dikgutliso mme sena se bebofattse boima ba hore balefalekgetho ba iketsetse sena ka bobona.

Balefalekgetho ba kgethetsweng *Auto Assessment* pakeng tsa la 1 le 12 Phupu 2026 ba se potlakele Ditsing tsa Tshebeletso tsa SARS. Seo ba lokelang ho se etsa, ke ho emela dikgokahanyo tsa semmuso tsa SARS le ho lekola dihlahlobo tsa bona ka tsela ya eFiling, SARS MobiApp, kapa dikanele tse ding tsa dijithale tsa semmuso.

“Ka lebaka la boiqapelo, metjha e kgannwang ke deitha mmoho le diphetoho tsa dijithale, SARS e etsa hore ho faelwa ha lekgetho ho be bonolo, ho potlake mme e se be ntho e boima”, ho rialo Khomeshenara. “Sepheo sa rona se hlakile: ho nolofaetsa balefalekgetho ho ikobela ha ka lehlakoreng le leng re ntse re ntlafatsa tshebeletso, re tlisa nnetefaletso le ho aha botshepehi hodima mokgwatshebetso wa lekgetho”.

Le ha SARS e ntlafaditse ditshebeletso tsa yona tsa dijithale le ditaolo tsa tshireletso, Khomeshenara o lemositse balefalekgetho hore ba dule ba fadimehetse dikema, ditlhaselo tsa boqhekanyetsi ba inthanete, dikema tsa leshano tse mabapi le dipusetso mmoho le ditsebi tse sa ngodiswang tsa lekgetho ka nako ena ya Sehla sa ho Faela.

SARS e keke ya o kopa di-password, di-one-time pin (OTPs), diphini tsa banka kapa dintlha tsa ho kena ho eFiling ka imeile, SMS, mapatlalo a marangrang a phedisano kapa mohala. Balefalekgetho ba tlameha ho sebedisa dikanele tsa semmuso feela tsa SARS le ho nnetefatsa dintlha tsa setsebi sefe kapa sefe sa lekgetho pele ba arolelana lesedi la bona le bona.

“Balefalekgetho ba lokela ho fadimehela mang kapa mang ya ba nnetefaletsang ho fumana pusetso kapa ya ba kopang lesedi le hlokolosi ntle le nnetefatso e

nepahetseng. Tshireletso ya lesedi la hao ke boikarabelo ba hao le ba SARS ka kopanelo”, o lemositse jwalo Khomeshenara Makhubu.

O tlatsitse ka hore: “Sehla sa ho Faela sa 2026 se bontsha kgatelopele eo SARS e ntseng e tswela pele ho e bontsha ya ho etsa hore taolo ya lekgetho e be ya sejwalejwale le hore dintho di nolofalle balefalekgetho. Ka di-Auto Assessment tse ntlafaditsweng, dikanale tse ntlafaditsweng tsa dijithale, tshireletseho e ntlafaditsweng, le dikanale tse atolositsweng tseo batho ba ka ithusang ho tsona, le boiqapelo bo rarolang mathata bo kang ba WhatsApp, re etsa hore boikobelo bo nolofale le ho feta pele”.

“Molaetsa wa rona ho balefalekgetho o bonolo: sebedisa ditshebeletso tse na tsa dijithale, tshepa dikanale tsa semmuso tsa SARS, mme o dumella thekhnoloji hore e o sebeletse. Ebang re etsa hore boikobelo bo be bonolo, re etsa hore le mokgwatshebetso wa rona wa tikoloho ya tsa lekgetho le ona o be matla molemong wa bohle”.

Ho fumana lesedi le fetang lena, ikopanye le [SARSMedia@sars.gov.za](mailto:SARSMedia@sars.gov.za).